

Val Puschlav porta da salvament

Fugitivs civils e militars 1943–1945

DA GUIU SOBIELA-CAANITZ

■ «Desch dis a l'inlunga ha d'ura l'ininteruot cortegi da fugitivs. Infin 1200 d'eiran a Scuol ün'unica saira, 14 naziunalitats in üna vouta (...). Destin uman, da la plü trista sort ans apparit, uschè cha nus ans svarguognaivan bod da nossa furtüna» (1). Uschia scriveva Erica Gaudenz-Bivrun (Scuol) en il «Chalender ladin 1946», rapportond da l'onda da fugitivs vegnida si da Martina durant ils davos dis da la Segunda guerra mundiala. Ma l'Engiadina Bassa n'era betg l'unica porta da salvament per umans che fugivan la terrur dals nazis. Gia la capitulaziun taliana da 1943, firmada cun general Dwight David Eisenhower (1890–1969), ha mess ad ir reacziuns da marschal Albert Kesselring (1885–1960), schefcumandant da las truppas tudestgas en Italia, che han chaschunà la fugia da nundumbraivels umans vers il territori grischun.

L'onn 1943 en Italia

Co èsi vegnì adaquella? Igl ha entschavì ils 25 da fanadur 1943, trais dis suenter l'entrada da las truppas americanas a Palermo. Lezza giada ha il «Gran Consiglio del Fascismo» a Roma, en il Palazzo Venezia, approvà ina moziun cun l'intent da «privar Mussolini da la pussanza e d'abolir il sistem che lez aveva stabili dapi 1925» (2). Sin quai ha il retg arrestà il «Duce» ed affidà la presidenza da la regenza a marschal Pietro Badoglio (1871–1956). Lez ha declarà senza targlinar che l'Italia restia en la guerra sco alliada da la Germania; a medem temp ha'l mess ad ir contacts secrets cun ils inimis. «Ils 8 da settember ha Eisenhower proclamà l'armistizi cun l'Italia. Las cuntramesiras tudestgas han cumenzà immediat (...). Ils 9, suenter cumbats violents, han ils Tudestgs pudì (...) occupar Roma (...). Er ils 9 ha l'armada [tudestga] occupà il Tirol dal sid ed il Trentin, lur il Veneto, l'Emilia-Romagna, Liguria, Lombardia e Piemunt, latiers parts da la Toscana e las Marcas (...), discharmond ed internond la pli grondada part da las truppas talianas [en lezzas regiuns] (...). Fitg blera schuldada taliana ha tuttina pudì svanir e turnar a chasa» (3). Era praschuniers britannics, grecs, serbs euv. da l'armada taliana han pudì fugir; la destinaziun da blers era s'enclegia la Svizra. Quai valeva era per la populaziun giudaica da l'Italia, gia discriminada dapi las mesiras antisemitas da 1938 e che na pudeva spetgar nagina misericordia da las autoritads d'occupaziun. Ils 12 han paracadaders e schuldads tudestgs liberà il «Duce»; ils 15 en la Lombardia occupada ha'l



La Val Puschlav.

KEYSTONE

fundà la «Repubblica Sociale Italiana» (RSI), vairamain vasalla da Germania. I na smirveglia tuttina betg ch'ils schabetsgs da settember 1943 han stimulà blers umans che stevan gugent u navidas en l'Italia dal nord da fugir vers la Svizra. Tant pli che la RSI, ils 30 da november, ha cumandà a las autoritads da sias provinzas da deportar tuts gidieus «in appositi campi di concentramento» e da sequestrar lur bains.

La Societad istorica da Val Puschlav

Sin la carta geografica para la Val Puschlav ina sort det che sa stenda ora tranter Grosio e Chiesa in Valmalenco, bunamain enfin al flum Adda. Da Tiraun arriv'ins svelt a Campocologno, pia gia en Svizra. Quai han fatg blers umans suenter ils 8 da settember 1943 per mitschar da la praschunia, la deportaziun e schizunt l'extripaziun. Dal redactur puschlavin Remo Tosio è gist cumparì in artitgel davart quella fugia (4). L'autur distingua tranter fugitivs militars e civils: «Areguard ils militars era Elio Paganini (1915–1981) da Zalende (Brüsch) fitg impurtant. El possedeva terrens agriculs en Vuclina, nua ch'el gieva savens; perquai aveva'l buns contacts cun la gliעד da là. Il viceconsul britannic a San Murezzan e la Delegaziun da l'alleanza [atlantica] a Berna l'han incumbensà en tutta furma [da gidar fugitivs militars en Vuclina]. Uffizialmain ha'l salvà 134 (...) mitschads da champs da praschuniers en l'Italia dal nord. Ma tgi sa quants civils ch'el ha era salvà e zuppà (...)? L'autorità militar tudestga en Italia al tschertgava» (pp. 133–134). La Societad istorica da Val Puschlav (www.ssvp.ch), fundada 1996, maina in center per la conservaziun e consultaziun da material istoric en la Chasa Besta da Brüsch. Ella «ha dastgà

survegnir da l'Archiv federal (Bern) ina banca da datas davart ils fugitivs civils entrads en la vallada durant la Segunda guerra mundiala (...). Ils blers èn arrivads durant ils mais suenter [la proclamaziun da] l'armistizi ils 8 da settember 1943. Dals 1647 fugitivs eran 1365 civilists e 282 militars, (...) 829 gidieus, 484 catolics e 109 ortodoxs serbs (...). In cronist e fotograf da l'armada svizra, en visita a Campocologno ils 18 e 19 da settember 1943, scriva: 'Blers fugitivs han surmuntà sdratschads ils culms. Gliעד gidaivla da Campocologno ha aranschè svelt ina collecta da vestgadira» (pp. 134–135). Tosio citescha l'istoricher Andrea Tognina che rapporta da dus cas tragics. La fugitiva Vittoria Ascoli-Liebmann, arrivada damanaivel da Campocologno, è crudada mortalmain en in precipizi la saira dals 2 da december 1943. Ils 17 d'avust 1944 han ins chattà sin in'alp da Brüsch la bara dal Grec Demetre Drossos, probablmain praschunier da guerra fugì. Tosio punctuescha: «I manca documentaziun davart quai ch'ils fugitivs han fatg atras, (...) davart lur exil e lur contacts cun la populaziun locala» (p. 135). Tant pli impurtant èsi da conservar e duvrar ils documents existents.

1. Città en: Jacques Guidon, Göri Klainguti e Chasper Pult (ed.), Clamaints. Cuir (Amministrazione chantunala da mezs d'instrucziun) 1983, p. 459.

2. Rudolf Lill, Geschichte Italiens in der Neuzeit. Terza ediziun revedida e schlargiada. Darmstadt (Wissenschaftliche Buchgesellschaft) 1986, p. 361.

3. Rudolf Lill (sco nota 2), p. 364.

Remo Tosio, Durante la seconda guerra mondiale numerosi rifugiati hanno trovato accoglienza in Val Poschiavo, en: Pro Grigioni Italiano, Almanacco del Grigioni Italiano 2012, Cuir, pp. 132–137